



Compostela Aberta
Grupo Municipal

MOCIÓN PARA INSTAR O GOBERNO GALEGO PARA QUE IMPULSE UN 'ACORDO NACIONAL PARA O MONTE GALEGO'

Xan Duro Fernández, concelleiro de Medio Ambiente, Convivencia e Informática, presenta ao Pleno para a súa aprobación a seguinte **MOCIÓN**

EXPOSICIÓN DE MOTIVOS

No pasado 15 de outubro Galicia sufriu unha trágica xornada na que chegaron a estar activos máis de 130 incendios forestais. Este lume non só arrasou millares de hectáreas de terreo -aínda non existen datos oficiais- e causou danos materiais dificilmente cuantificables, senón que mesmo levou por diante a vida de catro persoas.

Por todo o país vivíronse escenas de pánico como as que aínda tiñamos tan presentes da vaga de incendios de 2006. Nese ano, arderon en toda a comunidade 96.000 hectáreas, unha cifra que queda moi lonxe das 200.000 que resultaron queimadas en 1989.

Despois do desastre ambiental dese ano, a Xunta empezou a traballar no que sería o Plan Forestal de Galicia 1992-2032, un documento básico que establece o modelo forestal a longo prazo e fixa as liñas de acción da administración autonómica neste eido. Entre os seus obxectivos, o PFG falaba da recuperación do patrimonio natural e dos bosques autóctono e do fomento dunha cultura forestal na sociedade galega acorde coa importancia estratéxica do monte e do sector forestal.

En xullo de 2016, o Consello de Contas fixo público un informe de avaliación do Plan Forestal de Galicia, máis en concreto da súa execución no período 2008-2012. Nel, o ente fiscalizador das contas públicas galegas critica que "aínda que o primeiro obxectivo do Plan Forestal era a estruturación e capitalización dos espazos forestais, transcorridos máis de vinte anos desde a súa aprobación os esforzos orzamentarios seguen concentrados no programa de prevención e extinción de incendios". De feito, o plan fixaba como obxectivo dedicar ás políticas forestais o 3% do total dos orzamentos autonómicos, pero no período analizado destinouse a ese fin o 1,55 % das contas públicas, e executouse o 1,44 %. En 2014, a porcentaxe executada baixou aínda máis, ao 1,22 por cento.

No mesmo informe apúntase que no período 2008-2012 debéra dedicarse á prevención de incendios un 13,20 % do total do orzamento do Plan, fronte a un 86,80 % para o fomento das políticas forestais, pero "a realidade orzamentaria do quinquenio amosa como se inverte esa porcentaxe". Engade o ente fiscalizador "que o primeiro obxectivo do Plan é a estruturación e capitalización dos espazos forestais, porén obsérvase que os esforzos orzamentarios concéntranse no programa de prevención e extinción de incendios". A maiores do



reparto orzamentario, o informe do Consello de Contas apunta ao escaso cumprimento do Plan Forestal de Galicia 1992-2032.

As recomendacións do Consello de Contas e as do propio Plan Forestal de Galicia apuntan ao que é unha evidencia: os incendios forestais non se poden tratar con independencia de cuestións máis amplas relacionadas coa ordenación do territorio e coas políticas vinculadas ao sector gandeiro e agrícola. A súa abordaxe non se pode limitar a accións curtopracistas, senón que son precisas políticas a medio e longo prazo que, xa que logo, esixen o consenso de todos os axentes implicados: políticos, sociais e empresariais.

Tampouco se pode simplificar o debate ao redor do lume, poñendo o foco unicamente en quen ou como se prende a primeira chama ou falando de tramas organizadas que, polo de agora, non foron identificadas nin na vaga de lumes do pasado 14 de outubro, nin na de 2006, nin na de 1989.

Loitar contra os incendios forestais implica traballar para termos un monte integrado, máis bosques naturais e menos plantacións, nos que se aproveiten os recursos naturais de xeito sostible e sen comprometer a súa viabilidade.

En base a todo o exposto anteriormente o grupo municipal de Compostela Aberta solicita ao pleno do Concello de Santiago da adopción do seguinte:

ACORDO ÚNICO

- Instar á Xunta de Galicia para que impulse un 'Acordo nacional para o monte galego' que permita superar a situación actual de desastre ambiental e social. Un novo pacto que implique unha nova política forestal que, partindo de análises pluridisciplinares, achegue solucións a longo prazo e para as próximas décadas. Este acordo nacional recollería, como mínimo, as seguintes cuestións:
 - a) A implicación de todos os sectores e axentes implicados acadando un consenso de base social con propietarios, produtores, movementos sociais, grupos políticos e sindicais, e trasladar o mesmo ao sector industrial implicado. O obxectivo ten que ser revertir a tendencia do gasto público, destinando máis esforzo á reestructuración do sector primario, o cal revertirá nuns menores custos en prevención e extinción.
 - b) Un novo modelo de xestión e aproveitamento do monte galego que recoñeza e protexa as súas funcións ecosistémicas e sociais, que sexa partillado e corresponsabilizado por todos os axentes e con fortes doses de innovación social, así como a profesionalización das tarefas silvícolas e o emprego dos mellores avances científicos.



- c) Un dispositivo único e público de loita contra os incendios que progresivamente implique a eliminación de todas as contratacións de persoal alleas a este servizo público e a publicación de Ofertas Públicas de Emprego que combatan a precariedade laboral actual de grande parte destes traballadores.
- d) Unha planificación transversal que implique tamén unha política agraria e gandeira que sexa o instrumento necesario para unha promoción da agricultura e a gandería asentadas no territorio. Así como de medidas que favorezan a implantación no ámbito rural de pequenas industrias de transformación e servizos vinculados ao sector primario e ambientalmente sustentables
- e) O impulso de prácticas "naturalizadoras", que teñan en conta a fauna e flora autóctonas e a complexidade dos ecosistemas, fomentando o cultivo daquelas especies arbóreas caducifolias, propias do país, que polas súas características favorecen a retención de auga no ecosistema e un menor desenvolvemento da matogueira.
- f) Moratoria inmediata para a plantación de eucalipto e posterior fixación dun límite para a ocupación do territorio por monocultivos de especies pirofitas (eucalipto, piñeiros, ...), atendendo especialmente ao efecto que a mudanza climática pode ter no sur e centro do país. Eliminación inmediata do eucalipto nos espazos protexidos.
- g) Políticas de educación ambiental e valoración do rural e do monte como un elemento enriquecedor e singularizador da sociedade galega.
- h) Derogación ou adaptación de toda a lexislación que prime o aproveitamento industrial do monte fronte os usos tradicionais e comunitarios.

Xan Duro Fernández

Concelleiro de Medio Ambiente, Convivencia e Informática

**DURO FERNANDEZ
XAN XESUS -
32774156F**

Digitally signed by DURO
FERNANDEZ XAN XESUS - 32774156F
DN: c=ES, serialNumber=32774156F,
sn=DURO FERNANDEZ,
givenName=XAN XESUS, cn=DURO
FERNANDEZ XAN XESUS - 32774156F
Date: 2017.10.19 10:57:26 +02'00'